

४

अछ्यन आय तु गछुन गछे, पकुन गछे द्यन क्यो राथ ।
योरय आयि तु तूर्य गछुन गछे, केह नतु केह नतु केह नतु क्याह ॥

★ ★ ★

५

अजपा गायत्री हम्सु हम्सु जँपिथ
अहम त्रॉविथ सुय अदु रठ ।
येम्य् त्रोव अहं सुय रूद पानय
बो न आसुन छुय व्वपदीश ।

★ ★ ★

६

अटनुचि सनु दिथ थावन मटन
लूभ ब्वछि बोलन ज्ञानुच कथ ।
फटि फटि नेरन तिम कति वटन
त्रुकय मालि छुख पूर कड पथ ॥

★ ★ ★

७

अथु मबा त्रावुन खर बा
लूकु हुंज क्वंगु वॉर खेयिय ।
तति कुस बा दारी थर बा
येति नँनिस करतल पेयिय ॥

★ ★ ★

८

अनाहत ख-स्वरूप शून्यालय
यस नाव न वरन न गुथुर न रूफ ।
अहं व्यमर्श नाद बिंदुय यस वोन
सुय दीव अश्ववार प्यठ चेड्यस ॥

★ ★ ★

९

अब्यासु किनी व्यकास फोलुम
स्वकिंश ज़ोनुम योहय दीह ।
किंश दानु म्वखु यी दोरुम
स्वखुय बोरुम कोरुम ती ॥

★ ★ ★

१०

अब्याँस्य स-व्यकाँस्य लयि व्वथू
गगनस सगुन म्यूल समिच्चूटा ।
शून्य गोल तु अनामय म्वतू
योहय व्वपदीश छुय बटा ॥

★ ★ ★

११

अव्यस्ताँये पोथ्यन छि हो माले परान
यिथु तोतु परान राम पंजरस ।
गीता परान तु हीथा लबान
पँरुम गीता तु परान छस ॥

★ ★ ★

१२

असे प्वंदे ज्वसे ज़ामे
न्यथुय स्नान करि तीर्थन ।
वुहुर्य वहरस नोनुय आसे
निशि छुय तु परज़ानतन ॥

★ ★ ★

१३

अँसी आँस्य् तु अँसी आसव
असिय दोर कँर्य पतुवथ ।
शिवस सोरि नु युन तु गछुन
रवस सोरि नु अतुगथ ॥

★ ★ ★

१४

आगरय ग़ोज़ुम
वुगु वाने डूर सोगुम ।
ओरुकि क़पायि ज़गत वुज़ुम

योरु ति केह मे सूरुम नो ।।
(रहस्योपदेशस मंज छु यि वाख र्वपु भवॉनी सुत्य् आमुत मनसूब
करनु । वुछिव लल द्यद - कौल व तालिब)

★ ★ ★

१५

आगुरय रटख सार सारि तरख ।
अदु कवु मूडो फटख ज़ांह ।।

★ ★ ★

१६

आमि पनु सोदरस नावि छस लमान
कति बोज़ि दय म्योन मे ति दियि तार ।
आम्यन टाक्यन पोन्य् ज़न शमान
जुव छुम ब्रमान गरु गछु हा ।

★ ★ ★

१७

आयस कमि दिशि तु कमि वते, गछु कमि दिशु कवु ज़ानु वथ ।
अन्ति दाय लगिमय तते, छँनिस फ्वकस कांछ ति नो सथ ।।

★ ★ ★

१८

आयस वते गॅयस नु वते, सुमन स्वथि मंज लूसुम द्वह ।
चंदस वुछुम तु हार नु अथे, नावि तारस दिमु क्याह बो ॥

★ ★ ★

१९

आयस ति स्योदुय तु गछु ति स्योदुय
सेदिस होल मे कर्यम क्याह ।
बो तस ऑसुस आगरय व्यंजुय
वेदिस तु वैदिस कर्यम क्याह ।

★ ★ ★

२०

ऑरस नेरि नु मोदुर शीरय
न्यर वीर्यस नेरि नु शूरा नाव ।
मूर्खस पृनुन छुय हँस्तिस कशुन
यसौ मालि दांदस ब्यहा च़ाव ॥

★ ★ ★

२१

ऑसु बोल पॅडिन्यम सासा
मे मनि वासा खीद ना हिये ।
बो य्वद सहज शंकर बँख्य आसा
मुकरिस सासा मल क्याह पेये ॥

★ ★ ★

२२

ऑसुस कुनिय तु साँपुनिस स्यठाह
नँजदीख ऑसिथ गँयस दूर ।
जॉहिर बॉतिन कुनुय ड्युंठुम
गँयम ख्यथ चथ चुवंजाह चूर ॥

★ ★ ★

२३

आंचार हाँजनि हुंद गँयाम कनन
नदुर्य छिव तु हेयिव मा ।
ति बूज त्रुक्यव तिम रूद्य वनन
त्रेनुन छुव तु चीनिव मा ॥

★ ★ ★

२४

आंचार्य बिचार्य व्यचार वोनून
प्रोन तु रुहन हेयिव मा ।
प्रॉनिस बँजिथ मजा चुहुन
नदुर्य छिव तु हेयिव मा ॥

★ ★ ★

२५

ओमकार येलि लयि ओनुम
वुह्य कोरुम पनुन पान ।
शु-वोत त्रॉविथ सत् मार्ग रोटुम
तेलि लल बु वॉचुस किंशस्थान ॥

★ ★ ★

२६

ओमकार शरीर कीवल ज़ोनुम
शब्द रूप रस गंध सुती ह्यथ ।
आत्म स्वरूप सु पानय ओसुम
परम त्वथ दोरुम शेरस प्यठ ॥

★ ★ ★

२७

ओमुय ऑदी तु ओमुय सोरुम
ओमुय थुरुम पनुन पान ।
अनित्य् त्रॉविथ नित्य् अय बोसुम
तवय प्रोवुम परम अस्थान ।

★ ★ ★

२८

ओमुय अकुय अक्षर पोरुम
सुय मालि रोटुम व्वंदस मंज् ।
सुय मालि कनि प्यठ गोरुम तु चोरुम
ऑसुस सास तु सपनिस स्वन ॥

★ ★ ★

२९

ओमुय छुय व्वथपथ, ओमुय छय स्वरुन
ओमुय छु व्वपदीश परम ज्ञान ।
ओमुय परुन ओमुय स्वरुन
ओमुसुय सुत्त्य् छय ज्ञॉनी ज्ञान ॥

★ ★ ★

३०

ओरु ति पानय योरु ति पानय
पोत वाने रोज़ि नु ज़ांह ।
पानय गुप्त तु पानय ग्याँनी
पानय पानस मूद नु ज़ांह ॥

★ ★ ★

३१

ओरु ति पानय योरु ति पानय
पानय पानस छुनु मेलान ।
प्रथम अच्च्यस नु मुलेह दौनी
स्वय हा मालि छय आश्चर ज्ञान ॥

★ ★ ★

३२

कथ हा वनय कथ हा वनय
कथ म्यौन्य लयी लाल ।
मंज मॉदानस नैदुर पेयी
डूम्ब ह्यथ चॅली शाल ॥

★ ★ ★

३३

कथा बूजुम कथा वॅरुम
कथायि वॅरुम छौर्य सथ ।
शास्त्रकी कथा बूजुम
कथायि बास्यम सतुच वथ ।

★ ★ ★

३४

कमसन नैदरि तय कमसन वुदी
कमसन न्यश-ब्द बवन ।
कमसन लोलु नारु दैदी
कमसन सास तय कमसन स्वन ॥
कमसन मरनस ब्रॉठ मूदी
तिम ऑस्य् सास तय सपनी स्वन ॥ ॥

★ ★ ★

३५

क्याह करु पांचन दैहन तु काहन
व्वख्शुन यथ लेजि कॅरिथ यिम गॅय ।
साँरिय समुहॅन, यथ रजि लमुहॅन
अदु क्याजि राविहे काहन गाव ॥

★ ★ ★

३६

क्याह बोडुख मूहु बवु सोद्रि दरय
सौथ लुहरिथ पेयी तमु पाँख ।
यमु बठ करनय काँल्य् छोरु दरे
कवु ज़न कासी मरनुन्य् शेंख ॥

★ ★ ★

३७

कर्म ज्ञु कारन त्रे कोम्बिथ
यवु लबख परलूकस आँख ।
व्वथ खस सूर्य मंडल चोम्बिथ
तवय चॅल्य् मरनुन्य् शाँख ॥

★ ★ ★

३८

कर्मुक कुल नो छुय बॅनिथ गछुन
वॅनिथ गछुन क्याह छुय पाय ।
कश्फुक फल छुय मीलिथ गछुन
वॅलिथ रोजुन कुस छुय न्याय ॥

★ ★ ★

३९

कलन कालु जॉल्य् योदवय त्रे गोल
व्यंदिव गेह वा व्यंदिव वनवास ।
जॉनिथ सर्व गथ प्रभु अमोल
युथुय ज्ञान्यख त्युथुय आस ॥

★ ★ ★

४०

कवु छुख दिवान अनिने बॅछ
त्रुख अय छुख तु अंदरुय अछ ।
शिव छुय अँत्य् तय कुन मो गछ
सहज कथि म्यानि करतो पछ ॥

★ ★ ★

४१

क्वल तय म्वल कथ क्युत छुय
तोत क्युत छुय शांत स्वबाव ।
क्रयि हुंद आगुर वति क्युत छुय
अन्तिह क्युत छुय ग्वरु सुंद नाव ॥

★ ★ ★

४२

क्लीमुय पोरुम क्लीमुय सौरुम
क्लीमुय कचुम पनुनुय पान ।
क्लीमुय हनि हनि मोयन तोरुम
अदु लल वॉचुस ला मकान ॥

★ ★ ★

४३

कामस सुती प्रयि नो बॅरुम
क्रूदस द्युतुम पवनुन फेश ।
लूबस मूहस चरन चॅटिम
तृष्णा चॅजिम गॅयस ख्वश ॥

★ ★ ★

४४

कायस अंदर रूदुम अॅचिथ
न्यायस थॅवनम च्वपॉर्य शाय ।
पाय केंह लोबुम नो माय छस कॅरिथ
ज़ायस न आयस, लोगुम नाव ॥

★ ★ ★

४५

कायस बल छुय मायस ज़ागुन
प्रानस बल छुय शब्द स्वरूप ।
आयस बल छुय तत्वद्यद ज़ानुन
ज्ञानस बल छुय आदि अंत तान्य् ॥

★ ★ ★

४६

काँली सथ क्वल गछन पाताँली
अकाँली ज़ल मालु वर्षनि प्यन ।
मामस टाँक्यु तय मसु किय प्याली
ब्रह्मन तु च्छाँली इकवटु ख्यन ॥

★ ★ ★

४७

कुन्यर हय बोज़ख कुनि नो रोज़ख
कुनिरन कोरनम हुनी आकार ।
कुनुय आँसिथ दून हुंद जंग गोम
सुय बेरंग गोम कॅरिथ रंग ॥

★ ★ ★

४८

कुश पोश तेल दुफ ज़ल ना गछे
सद् बावु ग्वरु कथ युस मनि हेये ।
शम्बूहस स्वरि नित्यु पनुनि यछे
सय दॅप्युजे सहजा क्रये ॥

★ ★ ★

४९

कुस डिंगि तु कुस ज़ागि
कुस सर वँतरि तेली ।
कुस हरस पूज़ि लागि
कुस परमँ पद मेली ॥

★ ★ ★

५०

कुस पुश तय क्वसु पुशाँनी
कम कोसुम लॉगिज़्यस पूजे ।
कमि सरु गोड दिज़्यस ज़लदाँनी
कवु सनु मंत्रु शंकर स्वात्मु वुजे ॥

★ ★ ★

५१

कुस बब तय क्वसु माँजी
कँमी लॉजी बाँजीबठ ।
काँल्य् गछ़ख़ कांह नो बब कांह नो माँजी
ज़ॉनिथ कवु लॉजिथ बाँजीबठ ॥

★ ★ ★

५२

कुस मरि तय कसू मारन
मरि कुस तय मारन कस ।
युस हरु हरु त्रॉविथ गरु गरु करे
अदु सु मरि तय मारन तस ॥

★ ★ ★

५३

कुस हा मालि लूसुय नु पकान पकान
कुस हा मालि लूसुय नु व्वलगान समीर ।
कुस हा मालि लूसुय नु मरान तु ज़्यवान
कुस हा मालि लूसुय नु करान नैद्या ॥

★ ★ ★

५४

केंचन दित्थिम गुलालु यँचुय
केंचन ज़ोनुथ नु दिनस वार ।
केंचन छुनिथम नॉल्य् ब्रह्म हँचुय
बगवानु चानि गँच नमस्कार ॥

★ ★ ★

५५

केंचन द्युतुथम ओरय आलव
केंचव रचायि नालय व्यथ ।
केंचन अँछ लजि मस चथ तालव
केंचन पँपिथ गँय हालव ख्यथ ।।

★ ★ ★

५६

केंचन रनि छय शिहिज बून्य्
न्यबर नेरव शुहुल करव ।
केंचन रनि छय बरु प्यठु हून्य्
नेरव न्यबर तु जंग खेयव ।।
केंचन रनि छय अदल तु बदल
केंचन रनि छय जदल छाय ।।।

★ ★ ★

५७

केंह छी नेंदरि हँती वुदी
केंचन वुद्यन न्यसर पेयी ।
केंह छी स्नान कँरिथ अपुतिय
केंह छी गेह बँजिथ ति अक्रयी ।।

★ ★ ★

५८

केंहस प्यठुय क्याह छुय नचुन
म्वच्ची केंह नतु नचुन त्राव ।
पोत फीरिथ छुय तोतुय अचुन
योहय वचुन च्यतस थाव ॥

★ ★ ★

५९

कोसम बागस ह्योत मे अचुन
पच्चिये मन तु अचुन गिवं ।
स्वरूप दरशुन छु तोतुय अचुन
कोत छुय गछुन पकुन त्राव ॥

★ ★ ★

६०

कंद्यव गेह तीज्य् कंद्यव वनवास
व्यफोल मन ना रँटिथ तु वास ।
द्यन राथ गँजरिथ पनुन श्वास
युथुय छुख तु त्युथुय आस ॥

★ ★ ★

६१

कंद्यो ! करख कंदि कंदे
कंद्यो ! करख कंदि विलास ।
भूगय मीठ्य दितिथ यथ कंदे
अथ कंदि रोजि सूर नु तु सास ॥

स्वमनु गारुन मंज्र यथ कंदे
यथ कंदि दपान स्वरूप नाव ।
लूब मूह च़लिय शूब यियी कंदे
येथ्य कंदि तीज तय सौर किंश ॥

★ ★ ★

६२

क्रिया कर्म दर्म कोरुम
तीर्थन नाँवुम पनुन्य काय ।
पापन सौंबरिथ बसम कोरुम
तति कुस ओस तय योत कम आय ॥

★ ★ ★

६३

ख्यथ गँडिथ शेमि नो मानस
ब्रांथ यिमव त्राँव तिमय गँय खँसिथ ।
शास्त्र बूज़िथ छु यमु बय क्रूर
सु ना पोज़ तु दँनी लँसिथ ।।

★ ★ ★

६४

ख्यथ ति मूदी न ख्यथ ति मूदी
अदु ज़न गौडनख क्रूदुय नार ।
यिम हो मालि हंदि व्वपल हाकस प्यठ रूदी
तिम हो मालि अदु मूदी नु ज़ांह ।।

★ ★ ★

६५

ख्यनु ख्यन करान कुन नो वातख
न खयनु गछख अहंकोरी ।
सोमुय ख्य मालि सोमुय आसख
समि ख्यनु मुच्चरुनय बरन्यन तौर्य ।।

★ ★ ★

६६

गगन च्युय भूतल च्युय
च्युय छुख द्यन पवन तु राथ ।
अर्ग चंद्रुन पोश पोन्य् च्युय
च्युय छुख सोरुय तु लॉग्यज़ि क्याह ।।

★ ★ ★

६७

गगनस भूतलस शिव येलि ड्यूटुम
रवस लबि नु रोज़नस शाय ।
सिर्यिकि बिंवु विश्मय ज़ोनुम
ज़ल गौव थलस सुत्य् मीलित्थ क्याह ।

★ ★ ★

६८

ग्यानु मार्ग छय हाकु वॉर
दिज़्यस शम-दम क्रयि पॅन्य ।
लामा चक्रु पोशा प्रॉन्य् क्रयि-दॉर
ख्यनु ख्यनु म्वच्चिय वॉरुय छुन्य् ।।

★ ★ ★

६९

ग्यानुक्य् अम्बर पुरिथ तने
यिम पद ललि दॅप्पु तिम् हृदि आँख ।
कारुन्य् प्रणवुक्य् लय कोर लले
च्यथ ज्योत काँसुन मरनुन्य् शाँख ॥

★ ★ ★

७०

ग्रटु छु फेरान ज़ेरे ज़ेरे
आहुक्य ज़ानि ग्रटुक छल ।
ग्रटु येलि फेरि तय ज़ाँव्युल नेरे
गूं वाति पानय ग्रटुबल ॥

★ ★ ★

७१

ग्वरु कथ हृदयस मंज़ बाग रँटुम
गंगु ज़लु नाँवुम तन तुमन ।
सदेह ज़ीवन मुक्ति प्राँवुम
यमु बयि च़ोलुम पोलुम अख ॥

★ ★ ★

७२

ग्वरु शब्दस युस यछ पछ बरे
ज्ञानु वगि रटि च्यतु त्वर्गस ।
यँद्रेय शोमरिथ आनंद करे
अदु कुस मरि तय मारन कस ॥

★ ★ ★

७३

ग्वरस पृछाम सासि लटे
यस नु केँह वनान तस क्याह नाव ।
पृछान पृछान थँचिस तु लूसस
केँह नस निशि क्याहताम द्राव ॥

★ ★ ★

७४

ग्वरस मॉल प्यव आम्यन नाटन
बेयन पँश्यन स्वाद क्याह आसे ।
यि हाल ग्वरस तु राह क्याह च्चाटन
ब्रमु कुलिस म्यवु क्याह पेये ॥

★ ★ ★

७५

ग्वरन वौनुनम कुनुय वचुन, नेबरु दोपुनम अंदरुय अचुन ।
सुय गौव ललि मे वाख तु वचुन, तवय मे ह्योतुम नंगय नचुन ॥

★ ★ ★

७६

गाटुला अख वुछुम ब्वछि सुत्त्य् मरान
पन ज़न हरान पोहुनि वावु लाह ।
न्यश-ब्वद अख वुछुम वाज़स मरान
तनु लल बो प्रारान छेन्न्यम ना प्राह ॥

★ ★ ★

७७

गायत्री अज़ पा छलु अकि ताँजिम
सूहम सतुची वॅरमस थफ ।
अहमस लोत पाँठ्य ज़ठरुय वाँजिम
ग्वरु कथ पाँजिम च़ाँजिम च़ख ॥

★ ★ ★

७८

गाल गँडिन्यम बोल पँडिन्यम
दँपिनम ती यस यि रोत्रे ।
सहज़ कुसुमव पूज वॅरिन्यम
बो अमलॉन्त्य् तु कस क्याह म्वत्रे ॥

★ ★ ★

७९

गॉफिलो हक कदम तुल, वुनि छय सुल तु छांडुन यार ।
पर कर पैदा परवाज़ तुल, वुनि छय सुल तु छांडुन यार ॥

★ ★ ★

८०

च्च्यतु त्वर्ग वगि ह्यथ रोटुम, च्चेलिथ मिलविथ दशि नाडि वाव ।
तवय शशकल व्यगलिथ वॅछुम, शुन्यस शुन्याह मीलिथ गव ॥

★ ★ ★

८१

च्च्यत त्वरुग गगनु ब्रमु-वोन, निमिश अकि छंडि यूज़नु लछ ।
च्च्यतुनि वगि ब्वदि रॅटिथ ज़ोन, प्रान अपान संदॉरिथ पखुच ।

★ ★ ★

८२

च्च्यथ अमर ? ? थॅव्य ज़े
ति त्राविथ लगो ज़ूडे ।
तति च्चु नोशिक्य ज़े सुंदर्य ज़े
द्वदु शुर ति क्वछि नो मूडे ॥

★ ★ ★

८३

च्यथ नोवुय चंद्रम नोवुय
जलमय ड्युंतुम नवम नोवुय ।
यनु प्यठु ललि मे तन मन नोवुय
तनु लल बो नवम नवुय छस ॥

★ ★ ★

८४

च्यदानंदस ज्ञान प्रकाशस
यिमव च्यून तिम ज्जीवनुत्य् म्वख्तु ।
विशम्यस समसारुनिस पाशस
अबोद्य गंडाह शथ शेत्य दित्य् ॥

★ ★ ★

८५

चरमन च्रॅटिथ दितिथ पॉन्य पानस
त्युथ क्याह वव्योथ तु फलिही सोव ।
मूडस व्वपदीश गॅय रींज्य् दुमटस
कॅन्य दांदस गोर आपरिथ रोव ॥

★ ★ ★

८६

चलु चिंता वंदस भयि मो बर
चोन चिन्थ करान पानु अनाद ।
चे को जनुन्य् ख्योद हरि कर
कीवल तसुंदुय तारुक नाद ।।

★ ★ ★

८७

चामुर छँतर रथ सिम्हासन
हलाद नाट्य-रस तुलु प्रेख ।
क्याह मॉनिथ येति सँथिर आसवुन
कवु जनुन कासी मरनुन्य् शँख ।।

★ ★ ★

८८

चालुन छुय वुजमलु तु त्रटय
चालुन छुय मंदिन्यन गटुकार ।
चालुन छु पान पनुन कडुन ग्रटय
ह्यथ मालि संतूश वातिय पानय ।।

★ ★ ★

८९

चु ना बो ना ध्येय ना ध्यान
गौव पानय सर्व क्रिय मँशिथ ।
अन्यव ड्युंठुख केंछ ना अनवय
गँयि सथ लयि पर पँशिथ ॥

★ ★ ★

९०

चुय दीव गरतस तु धरती स्रजख
चेय दीवु दितिथ क्रंजन गिन ।
चुय दीवु ठनि रोस्तुय वजख
कुस ज्ञानि दीवु चोन परमान ॥

★ ★ ★

९१

छु कुने छु ना कुने
वुछुम ओरु योर ना कुने ।
दयि फल तय म्वल ना कुने
चुय चेन तो गारुन ना कुने
(रहस्योपदेशस मंज छु यि वाख र्वपु भवॉनी सुत्य् मनसूब करनु
आमुत ।
वुछिव लल द्यद - कौल तु तॉलिब)

★ ★ ★

९२

छस केंह नतु ऑसुस केंह नय
केंह निस केंह नतु केंह गोम तॅरिथ क्यथ ।
शिव पूज़न वुछुम नारान
केंह निस केंह नतु केंह गोम तॅरिथ क्यथ ।

★ ★ ★

९३

छांडान लूसुस पॉनी पानस
छेपिथ ज्ञानस वोतुम ना कूंछ ।
लय कॅरमस तु वॉचुस अल-थानस
बॅर्य बॅर्य बानु तु च्यवान नु कूंछ ॥

★ ★ ★

९४

छोंडुमख ब्वनु तु बेयि च्वन दिशान
नेब तु निशानु लोबुमय नु कुने ।
ती अदु पृछुम सादन तु रेशान
तिम लॅग्य् ति बूज़िथ वदनि तु रिवने ॥
दब येलि द्युतुम फिकरन तु अंदेशन
अदु येति लोबुमख पनुनि गरे ॥ ॥

★ ★ ★

९५

जगस अंदर काँत्याह पॉलिम
साँरी छि छांडान दयि संज वथ ।
छि मंजु अँकिस दया जॉनिम
माँनिम दँप्यजि ईश्वर गथ ॥

★ ★ ★

९६

जननि जायायि रुत्य् तॉय कुती
कँरिथ व्वदरस बहु कलीश ।
फीरिथ द्वार बजनि वाति तँती
शिव छुय कूठ तय च़ेन व्वपदीश ॥

★ ★ ★

९७

जन्म प्राँविथ व्यभव ना छोंडुम
लूबन बूगन बँरुम नु यिं ।
सोमुय आहार स्यठाह ज़ोनुम
च़ोलुम दूख-वाव पोलुम दय ॥

★ ★ ★

९८

ज़नम प्रॉविथ कर्म सोवुम
धर्म पोलुम स्वय छम सथ ।
नेत्रन अंदर प्रेयम दोरुम
चौरुम तु मोनुम योहय अख ॥

★ ★ ★

९९

ज़ल थमवुन हुतवाह तुरनावुन
ऊर्ध्वगमन पुरेव च़रिथ ।
काठ धेनि दूद श्रमावुन
अंति सकलय कपटु च़रिथ ॥

★ ★ ★

१००

ज़ल हा मालि लूसुय नु पकान पकान
सिरिं लूसुय नु व्वलगान समीर ।
च़ंद्रम लूसुय नु मरान तु ज़्यवान
मनुष्य लूसुय नु करान नैद्या ॥

★ ★ ★

१०१

ज़लु प्यठु पकुन थ्यकुन लूकन
नारस अचुन मारस व्यद ।
आकॉश गमनव वुफुन आसुन
कपट बासुन आसुन च्यथ ॥

★ ★ ★

१०२

ज़ानुहॉ नाडि दल मनु रँटिथ
चँटिथ वँटिथ कुटिथ क्लीश ।
ज़ानुहा अदु अस्तु रसायन गँटिथ
शिव छुय क्रूठ तु च़ेन व्वपदीश ॥

★ ★ ★

१०३

ट्योठ मोदुर तय म्यूठ ज़हर
यस यूत छुनुख जतन बाव ।
येम्य् यथ कँरुय कल तु कहर
सु तथ शहर वॉतिथ प्यव ॥

★ ★ ★

१०४

तनु मनु गॅयस बो तस कुनुय
बूजुम सतुच गंटा वज्जान ।
तथ जायि धारनायि धारन रॅटुम
आकाश तु किंश कोरुम सर ॥

★ ★ ★

१०५

त्यंबुर पेयस कवु नो च्चॉजिन
मस रस कवु अँह नॉजिन गोस ।
शांत्यन हुंज क्रय तोलु म्वलु वॉजिन
अँदरिम गाह येलि न्यबर प्योस ॥

★ ★ ★

१०६

तलु छुय ज्युस तय प्यठु छुख नच्चान
वनतु मालि मन क्यथु पच्चान छुय ।
सोरुय सॉब्रिथ येत्य् छुय म्वच्चान
वनतु मालि अन क्यथ रोच्चान छुय ॥

★ ★ ★

१०७

तिम छिनु मनुश तिम छि रेश
यिमन दीह मनु निशि गौव ।
बँडिथ तु बुडिथ ब्याख क्या रछी
फुट्चमुतिस बानस पेयि ग्यव ॥

★ ★ ★

१०८

तुरि सलिल खोत तौय तुरे
हेमि तुर गँयि ब्यन अब्यन व्यमर्शा ।
चैतन्य् रव भाति सब समय
शिवमय च़राच़र जग पश्या ॥

★ ★ ★

१०९

तंतुर गलि तौय मंथुर म्वच्चे
मंथर गोल तौय मोतुय च़्यथ ।
च़्यथ गोल तौय केंह ति ना कुने
शून्यस शून्याह मीलिथ गौव ॥

★ ★ ★

११०

दमु दमु ओमकार मन परुनोवुम
पानय परान तु पानय बोज़ान ।

सूहम पदस अहम गोलुम
तैलि लल बु वॉचस प्रकाशस्थान ॥

★ ★ ★

१११

दमु दमु कोरमस दमन आये
प्रज़ल्योम दीप तु ननेयम ज़ाथ ।
अँद्रिम प्रकाश न्यबर छोटुम
गटि रोटुम तु कर्मस थफ ॥

★ ★ ★

११२

दमन बस्ति दितो दम
तिथय यिथु दमन खार ।
शस्त्रस स्वन गछी हॉसिल
वुनि छय सुल तु छांडुन यार ॥

★ ★ ★

११३

दमी ड्युंतुम शबनम प्यवान
दमी ड्युंतुम प्यवान सूर ।
दमी डींठुम अनिगटु रातस
दमी ड्युंतुम दूहस नूर ॥

★ ★ ★

११४

दमी ऑसुस ल्वकुट कूरा
दमी सपनुस जवान पूर ।
दमी ऑसुस फेरान थोरान
दमी सपनुस दॅज़िथ सूर ॥

★ ★ ★

११५

दमी डींठुम नद वहवुनी
दमी ड्युंठुम सुम न तु तार ।
दमी डींठुम थॅर फवलुवुनी
दमी ड्युंठुम गुल न तु खार ॥

★ ★ ★

११६

दमी डींठुम गॅज दज़ुवुनी
दमी ड्युंठुम दुह न तु नार ।
दमी डींठुम पांडवन हुंज़ मॉजी
दमी डींठुम क्रॉजी मास ॥

★ ★ ★

११७

द्वह तारु दुनियहस लोल बोरुम
पतव ज़ोनुम केंह नतु क्याह ।
हावसु ललि मे अँलिमाह पोरुम
पर पर कोरुम, पूरुम नु ज़ांह ॥

★ ★ ★

११८

दँछिनिस ओबरस ज़ायुन ज़ानुहा
सोदरस ज़ानुहा कँडिथ अठ ।
मँदिस रूगियस वैद्युत ज़ानुहा
मूडस ज़ॉनिम नु निथि कथ ।

★ ★ ★

११९

दिलु किस बागस दूर कर गासिल
अदु द्यव फवलिय यँबुरज़लु बाग ।
मँरिथ मंगनय वुमरि हुंद हॉसिल
मौत छुय पतु पतु तँहसीलदार ॥

★ ★ ★

१२०

दिहचि लरि दारि बर त्रोपरिम
प्रानु चूर रोटुम तु द्युतुमस दम ।
हृदयिचि कूठरि अंदर गौंडुम
ओमु कि चोबुकु तुलमस बम ॥

★ ★ ★

१२१

दीव वटा दिवुर वटा
प्यठ ब्वन छुय यीकुवाठ ।
पूज कस करख हूट बटा
कर मनस तु पवनस संग्गाठ ॥

★ ★ ★

१२२

दीशि आयस दश दीशि चॅलिथ
चॅलिथ च्रोटुम शून्य् अदु वाव ।
शिवुय ड्युंठुम शायि शायि मीलिथ
शे तु त्रे त्रोपिमस तु शिवुय द्राव ।

★ ★ ★

१२३

दोद क्याज ज्ञानि यस नो बने
गमुक्य् जामु वलिय तने ।
गरु गरु फीरुस पेयम कने
ड्युंठुम नु कांह ति पनुनि कने ॥

★ ★ ★

१२४

दोब्ज् येलि छाँवुनस दोब्ज् कनि प्यठुय
सज्ज तु साबन मँछनम यँचुय ।
सुच्च्य् येलि फिरुम हनि हनि काँचुय
अदु ललि मे प्राँवुम परम गथ ॥

★ ★ ★

१२५

द्वाद शांतु मंडल यस दीवस थज्जि
नासिकु पवनु दारि अनाहत रव ।
स्वयम कल्पन अन्ति ज्जि
पानय सु दीव तु अर्चुन कस ॥

★ ★ ★

१२६

दिलुक खुर खुर मे मालि कासतम मनुकि कोतर मरे
नरि लोसम लूकु हुंजु लरि लदान ।
तेलि पानु म्यान्यो वॅडिथ निनय पनुनि गरे
पतु पतु नेरि लूकु सासा नरि आलुवान
त्राँविथ यिनय मंज मॉदानस साँविथ दँछिनि लरे ॥

★ ★ ★

१२७

द्यन छेजि तु रजन आसे
भूतल गगनस कुन व्यकासे ।
चँदुर्य राह ? ? मावसे
शिव पूजुन गाह च्यथ आत्मसे ॥

★ ★ ★

१२८

न प्यायस तु न जायस
न खेयम हंद तु न शौठ ।
शन छस पतु तय
सतन छस ब्रौठ ॥

★ ★ ★

१२९

नफ्स द्युतुख ओरय मीनिथ
गछुखय चीनिथ करख नु फोत ।
दम द्यू हकस लाल ज़न ज़ीनिथ
नतु छुय कुल नफिस ज़ायिकतुलमोत ।

★ ★ ★

१३०

नफ्सुय म्योन छुय होस्तुय
अँम्य् हँस्य् मौगुनम गरि गरि बल ।
लछि मंज़ु सास मंज़ अखा लोस्तुय
नतु हेतिनम साँरी तल ॥

★ ★ ★

१३१

नाथ बो नो राँनी मंगय
मे रावुन राज कर्यम क्याह ।
यि गोम लीखिथ ति मा हर्यम
हर्यम हर्यम तु हर्यम क्याह ॥

★ ★ ★

१३२

नाथ! ना पान ना पर ज़ोनुम
सदोय बूदुम ईकुय दिह ।
चु बो बो चु म्युल नो ज़ोनुम
चु कुस बो क्वसु छु संदेह ॥

★ ★ ★

१३३

नाबुद्य बारस अटु गंड ड्योल गोम
देह-काण होल गोम ह्यकु कह्यो ।
ग्वरु सुंद वनुन रावनु त्योल प्योम
पाहलि रोस्त ख्योल गोम, ह्यकु कह्यो ॥

★ ★ ★

१३४

नार गछि सुहुन तु आर गछि गालुन
ओहुर गछि कडुन व्वपल हाकस तु हंदे ।
हद गछि रटुन तु मद गछि वालुन
वेह गछि च़ालुन तु अन्नख ग्रंदे ॥
शूब गछि कांछुन्य् तु लूब गछि मारुन
पान गछि नावुन अमी सेंदे ॥ ॥

(यि वाख छु नुन्दु ऋषिस (शैख-उल-आलमस) कुन ति मनसूब
यिवान करन् । वुछिव लल द्यद – कौल त् तौलिब ।)

★ ★ ★

१३५

नाँभिस्थानस चित जलुवुनी
ब्रह्मस्थानस शिशिरुन म्वख ।
ब्रह्मांडस छय नद वँहवुनी
तवय तुरुन हुह, हाह गव तोत ॥

★ ★ ★

१३६

नाँभिस्तानस छय प्रकरथ जलुवुनी
हडिस ताम येति प्रान वतु गोत ।
ब्रह्मांडस प्यठ सुत्य् नाडि वहुवुनी
हूह तवु तुरुन, हाह तवु तोत ॥

★ ★ ★

१३७

नियम कर्योथ गरबा, च्यतस कर बा पेयी ।
मरनु ब्रॉठुय मर बा, मँरिथ मरतबु हुरी ।

★ ★ ★

१३८

पटनुच सन दिथ थॉवन मटन
लूब बोछ बोलन ज्ञानुक्य गीत ।
फॅट्य फॅट्य नेरन तिम कति वटन
त्रुक अय मालि छुख पुर्य कड पथ ॥

★ ★ ★

१३९

परस हा मालि पोरुम तु पानस वुनुम
वनु कस ललि छुय मे पानस राह ।
वाय गोम दिलस मे क्याह कोरुम
कुनुय ऑसिथ सोरुम नु ज़ांह ॥

★ ★ ★

१४०

परान परान ज्यव ताल फॅजिम
त्रे युग्य क्रय तॅजिम नु ज़ांह ।
सुमरन फिरान न्योठ तु ऑगुज गॅजिम
मनुच दुय मालि चॅजिम नु ज़ांह ॥

★ ★ ★

१४१

परु तॉय पानु येम्य् सोम मोन
येम्य् ह्यु मोन द्यन क्यो राथ ।
येमिसुय अद्वय मन साँपुनुन
तमी ड्युंतुय सुर गुरुनाथ ॥

★ ★ ★

१४२

प्रथई तीर्थन गछान सँन्यास
ग्वारान स्वदर्शन म्यूल ।
च्यता पॅरिथ मो निष्पथ आस
डेशख दूरे द्रमुन न्यूल ।

★ ★ ★

१४३

प्राण तु रोहन कुनुय ज़ोनुम
प्राण बँज़िथ लबी नु साद ।
प्राण बँज़िथ केंह ति ना खेज़े
तवय लोबुम सूहम साद ॥

★ ★ ★

१४४

प्रानस सुती लय येलि वॅरुम
द्यानस चॅनम तु रोजनस शाय ।
कायस अंदर सोरुय वुछुम
पायस पोवुम वॅडमस ग्राय ॥

★ ★ ★

१४५

प्रनुवुन्यो लूकन छुख प्रनान
पानस छुय नु गछान कनन ।
यिथु पॉठ्य पुज छि नाटु कुनान
पानस नु पोशान पकुमोंड्य तु कन ॥

★ ★ ★

१४६

पवन तु प्रान सोमुय ड्यूटुम
ढलिथ रूदुम शेरख्वर ताम ।
दीहि येलि मोटुम अदु क्याह मोतुम
तु कुनि पवन तु न कुनि प्रान ॥

★ ★ ★

१४७

पवन पूरिथ युस अनि वगि
तस ब्व ना स्पर्शि न ब्वछि तु त्रेश ।
ति यस करुन अन्ति तगि
सम्सारस सुय ज़ेयि नेछ ॥

★ ★ ★

१४८

पॅरिथ तु बूज़िथ ब्रह्मन छ्यटन
आगर गटन तँहिदि वेदु सुत्य् ।
पटनुच सन निथ थवन मटन
मूहत मन गछ्यख अहंकोरी ॥

★ ★ ★

१४९

पानय आव पानस सुती
पानय पनुन कोरुन व्यञ्जार ।
पानय पनुन पान नेछुनोवुन
पानय गुपुन पानय पान ॥

★ ★ ★

१५०

पानय कासख तु पानय आसख
पानस निशि लबख नु सोदूर ।
जिंदु मरख तु मॅरिथ लबख
अदु छोन दिनय मॉरिफतुक सदूर ॥
दुयी योद कासख सुय अदु आसख
अदु नाव थवनय इन अलीम बज़ाति अलसदूर ॥ ॥

★ ★ ★

१५१

पानस लॉगिथ रोवुख मे च़य
मे च़ेय छांडान लूस्तुम द्वह ।
पानस मंज़ येलि ड्युंतुख मे च़य
मे च़े तु पानस द्युतुम छोह ॥

★ ★ ★

१५२

पोत ज़ूनि वॅथिथ मोत बोलुनोवुम
दग ललुनॉवुम दयि संज़ि यै ।
लॅल्य् लॅल्य् करान लालु वुज़नोवुम
मीलिथ तस मन श्रोच्योम दिहे ॥

★ ★ ★

१५३

पूरक कुम्बक रीचक कोरुम
पवनस त्रॉवुम पेठ्य किन्य् वथ ।
अनाहतस बस्म कोरुम
केंह नो मोतुम स्वय छय कथ ॥

★ ★ ★

१५४

परुन स्वलब पालुन द्वर्लब
सहज गारुन सिखम तु कूठ ।
अब्यासुकि गनिरय शास्त्र मोतुम
चीतन आनंद न्यश्चय गोम ॥

★ ★ ★

१५५

परुन पोलुम अपोरुय पोरुम
केसर वनु वोलुम रँटिथ शाल ।
परस प्रनुम तु पानस पोलुम
अदु गोम मोलूम तु ज़ीनिम हाल ॥

★ ★ ★

१५६

बबरि लंगस मुश्क नो मरे
हून्य् बस्ति कोफूर नेरि नु ज़ांह ।
मनु योद गारुहन फेरिय ज़ेरे
नतु शालु टुंगे नेरिय क्याह ॥

★ ★ ★

१५७

ब्रह्म बुरजस प्यठ वातुनोवुम
दिलुचे तारि सुत्य् दोपुमस लम ।
हम सू त्रॉविथ सूहम गिंवुम
दोपुनम लले अँत्यथुय श्रम ॥

★ ★ ★

१५८

ब्रॉठ कॉल्य् आसन तिथी केरन
टंग चूँठ्य पपन च़ेरन सुत्य् ।
माजि कोरि नेरन अथुवास वँरिथ
दूह द्यन बरन गिँद्यन सुत्य् ॥

★ ★ ★

१५९

बुधि क्याह जान छुख व्वंदु छुय कॅनिय
असलुच कथ ज़ांह सॅनिय नो ।
परान लेखान वुठ ऑंगुज गजिय
अँदुरिम दुय ज़ांह चॅजिय नो ॥

★ ★ ★

१६०

भान गोल तॉय प्रकाश आव ज़ूने
चँद्र गोल तॉय मोतुय च्यथ ।
च्यथ गोल तॉय कैह ति नु कुने
गॅय भूर भुवः स्वर व्यसर्जिथ क्यथ ॥

★ ★ ★

१६१

मद प्योम सैदि ज़लन ? ?
रंगन लीलॅम्य् गॅयम कुच्च ।
कुत्त्य् खेयम मनशि मामसुक्य् नॅल्य्
स्वय बो लल तु गौव मे क्याह ॥

★ ★ ★

१६२

मन डिंगि तु अक्वल ज़ागि
डॉड्य सरपंचि यंघ वॅतरि तेली ।
स्व-व्यचार पोन्य् हरस पूज़ि लागि
परम पद च्चीतन शिव मेली ॥

★ ★ ★

१६३

मन पुश तय यछ पुशॉनी
बावुक्य् कोसूम लॉगिज़्यस पूजे ।
शशि रसु गोड दिज़्यस ज़लदॉनी
छ्वपि मंत्र शंकर स्वात्मु वुजे ॥

★ ★ ★

१६४

मनस ग्वन छुय चंचल आसुन
च्यतस ग्वन छुय गछुन दूर ।
ज़ीवस ग्वन छुय ब्वछि त्रेश आसुन
आत्मस ग्वन छुय नासुन लीफ ॥

★ ★ ★

१६५

मनस सुती मनुय गौडुम
च्च्यतस रँटुम च्वपौर्य वग ।
प्रक्रुच सुती पोरुश वोलुम
सरु मे वँरुम लँबुम वथ ।

★ ★ ★

१६६

मनस ग्राय च्रँज पजिकुय अन्न ख्योम
तवकुय बल गोम वँरुमस क्रय ।
आगुर वॉतिथ अमृतु ज़ल चोम
छिवलय मन गोम बँरुमस यिं ।।

★ ★ ★

१६७

मल व्वंदि ज़ोलुम, जिगर मोरुम ।
तेलि लल नाव द्राम, येलि दँल्य् त्रॉविमस तँतिय ।।

★ ★ ★

१६८

मँकरिस ज़न मल च़ोलुम मनस
अदु मे लँबुम ज़नस ज़ान ।
सु येलि ड्यँटुम निशि पानस
सोरुय सुय तय बो नो कैह ।।

★ ★ ★

१६९

मायि ह्यु नु प्रकाश कुने
लयि ह्यु नु तीर्थ कांह ।
दयस ह्यु नु बांदव कुने
बयस ? ? ह्यु नु स्वख कांह ॥

★ ★ ★

१७०

मारुख मारु भूत काम क्रूद लूब
नतु कान बॅरिथ मारुनय पान ।
मनय ख्यन दिख स्व-व्यचार शम
विशय तिहुंद क्याह क्युथ दोर ज्ञान ॥

★ ★ ★

१७१

माॅरिथ पांछ भूथ तिम फल हँड्य
च्चीतन दानु वखुर ख्यथ ।
तदय ज्ञानख प्रम, पद, चँड्य
हिशी खोश खोर कोतु ना ख्यथ ॥

★ ★ ★

१७२

मिथ्या कपठ असथ त्रोवुम
मनस कोरुम सुय व्वपदीश ।
ज़नस अंदर कीवल ज़ोनुम
अनस ख्यनस कुस छुम द्वीश ॥

★ ★ ★

१७३

मूड ज़ॉनिथ पॅशिथ ति कोर
कोल श्रुतवोन ज़डु रुफ आस ।
युस यि दपी तस ती बोल
योहय तत्व वेदिस छु अब्यास ॥

★ ★ ★

१७४

मंदछि हाँकल कर छेन्यम
यैलि ह्यडुन गेलुन असुन प्रावु ।
आरुक जामु कर सनु दज़्यम
यैलि अँदर्युम खार्युक रोज़्यम वारु ॥

★ ★ ★

१७५

मँदिस विदुर तय विदरिस सँक्रेय
सँक्रेय करक मरक नु ज़ांह ।
सँक्रेय त्रॉविथ करक क्वक्रय
वँक्रय गछी बलख नु ज़ांह ॥

★ ★ ★

१७६

मूडस प्रुनुन छुय म्वय वाल चीदुन
मूडस प्रुनुन छुय मुरि द्युन कोह ।
मूडस प्रुनुन छुय समंदर पूरुन
मूडस प्रुनान रावी दूह ॥

★ ★ ★

१७७

मूडस ज्ञानुच कथ नो वँनिजे
खरस गोर दिनु राविय दूह ।
युस युथ करिय सु त्युथ स्वरे
क्रेरे वँरिजि नु पनुनुय पान ॥

★ ★ ★

१७८

मूडो क्रय छय नु दारुन तु पारुन
मूडो क्रय छय नु रछुन्य् काय ।
मूडो क्रय छय नु दीह संदारुन
सहज व्यचारुन छुय व्वपदीश ॥

★ ★ ★

१७९

यथ सरस सिर्य फोल ना व्यच्ची
तथ सरि सकली पोन्व चन ।
मृग सृगाल गँडि ज़लु हँस्ती
ज़्यन ना ज़्यन तु तोतुय प्यन ॥

★ ★ ★

१८०

यवु तुर च़लि तिम अम्बर ह्यता
ख्योद यवु गलि तिम आहार अन ।
च़ित्ता स्वपरु व्यचारस प्यता
च़ेनतन यि दीह वन कावन ॥

★ ★ ★

१८१

यि क्याह आँसिथ यि क्याह रंग गोम
संग गोम च्रँटिथ हुदहुदु ने दिगे ।
सारिनुय पदन कुनुय व्वखुन गोम
ललि मे त्राग गोम लगु कमि शाठय ॥

★ ★ ★

१८२

यि क्याह आँसिथ यि क्याथ रंग गोम
बेरंग वँरिथ गोम लगु कमि शाठय ।
तालव राजदानि अबख छान प्योम
जान गोम ज्ञान्यम पान पनुनुय ॥

★ ★ ★

१८३

यि यि कर्म कोरुम सु अर्चुन
यि रसनि व्वचोरुम तिय मंथुर ।
युहय लोगमो दिहस पचुन
सुय यि परमु शिवुन तंत्र ॥

★ ★ ★

१८४

यिमय शे च्चे तिमय शे मे
श्यामगला च्चे ब्यन ताँटिस ।
योहय ब्यन अभीद च्चे तु मे
चु शन स्वाँमी बो शे मुशिस ॥

★ ★ ★

१८५

यिहय मातृ रुप पय दिये
यिहय बाँर्या रुप करि विशीश ।
यिहय माया रुप अंति जुव हेये
शिव छुय कूठ तय च्चेन व्वपदीश ॥

★ ★ ★

१८६

युस हो मालि हेड्यम गेल्यम मसखँरी कर्यम
सुय हो मालि मनस खर्यम नु ज़ांह ।
शिव पनुन येलि अनुग्रह कर्यम
लूकु ह्यडुन मे कर्यम क्याह ॥

★ ★ ★

१८७

युह यि कर्म करु प्यत्रुन पानस
अर्जुन बर्जुन बेयिस क्युत ।
अन्ति लागि रोस्त पुशरुन स्वात्मस
अदु यूर्य गछि तु तूर्य छुम ह्योत ॥

★ ★ ★

१८८

येति बो गॅयस तति ओल सु
तति ड्यूठुम मोल सु ।
कनन छुनिथ वोल सु
सुय तय सु, सुय तय सु ॥

★ ★ ★

१८९

येमि लूभ मन्मथ मद चूर मोरुन
वति नाँश माँरिथ ति लोगुन दास ।
तँमिय सहज ईश्वर गोरुन
तँमिय सोरुय व्यौदुन स्वास ॥

★ ★ ★

१९०

येमी वॅर खुमस तलु कनि ज़ागय
तस गॅयि रतस तु कमस च़ांह ।
रबाबुक शुद येलि योरुम सीनस
कबाबु कनि दिज़मस पनुन्य् नाथ ॥

(यि वाख छु नुन्दु ऋषिस कुन ति मनसूब यिवान करनु । वुछिव
लल द्यद - तॉलिब तु कौल)

★ ★ ★

१९१

योसय शेल पीठस तु पटस
स्वय शेल छय प्रथवुन दीश ।
स्वय शेल शूबवुनिस ग्रटस
शिव छुय क्रूठ तय च़ेन व्वपदीश ॥

★ ★ ★

१९२

रव मतु थलि थलि तॉप्य़तन
तॉप्य़तन व्वतम दीश ।
वरुन मतु लूकु गरु अँच़्य़तन
शिव छुय क्रूठ तय च़ेन व्वपदीश ॥

★ ★ ★

१९३

राजस बाँज येम्य् करतल पाँज
स्वर्गस बाँज छुय तफ ताँय दान ।
सहजस बाँज येम्य् ग्वरु कथ पाँज
पाप-प्वन्य् बाँज छुय पनुनुय पान ॥

★ ★ ★

१९४

राजु हम्स आँसिथ सपदुख कोलुय
कुस ताम चोलुय क्याहताम ह्यथ ।
ग्रटु गौव बंद तु ग्रटन ह्योत गोलुय
ग्रटु वोल चोलुय फल फोल ह्यथ ॥

★ ★ ★

१९५

रावनु मंजय रावुन रोवुम
राँविथ अथि आयस बवुसरय ।
असान गिंदान सहजुय प्रोवुम
दपुनुय कोरुम पानस सरय ॥

★ ★ ★

१९६

रुत तु क्रुत सौरुय पज़्यम
कनन नु बोज़ुन, अँछन नु बावु ।
ओरुक दपुन येलि व्वंदि वुज़्यम
रत्न दीप प्रज़ल्यम वर्ज़नि वावु ॥

★ ★ ★

१९७

रोज़नि आयस गछुन गछ्यम
पकुन गछ्यम वाव लूकपाल ।
केंहनस प्यठुय नचुन गछ्यम
अचुन गछ्यम सूक्ष्म प्रकार ॥

★ ★ ★

१९८

रंगस मंज़ छुय ब्योन ब्योन लबुन
सौरुय च़ालख बरख स्वख ।
च़ख रुश तु वॉर गालख
अदु डेंशख शिवु सुंद म्वख ॥

★ ★ ★

१९९

लज्ज कासी शीत न्यवारिय
तून ज़ल करान आहार ।
यि कॅम्य् व्वपदीशु कौरुय बटा
अँचीतन वटस सँचीतन द्युन आहार ॥

★ ★ ★

२००

लतन हुंद माज़ लार्योम वतन
अँकिय हॉवनम अकिची वथ ।
यिम यिम बोज़न तिम कोनु मतन
ललि बूज़ शतन कुनिय कथ ॥

★ ★ ★

२०१

ल्यकु तु थ्वकु प्यठ शेरि ह्यँचुम
न्यंदा सपनिम पथ ब्रॉठ तान्य् ।
लल छस कल ज़ांह नो छेनिम
अदु येलि सपनिस वेपिहे क्याह ॥

★ ★ ★

२०२

लल बो लूसस छारान तु गारान
हल मे कोरमस रसु निशि तिय ।
वुछुन ह्योतुमस तौड्य डींठिमस बरन
मे ति कल गनेयि जोगुमस तँतिय ॥

★ ★ ★

२०३

लल बो द्रायस लोलु रे,
छांडान लूसुम द्यन क्यो राथ ।
वुछुम पँडिथ पनुनिय गरे
सुय मे रोटमस न्यछतुर तु साथ ॥

★ ★ ★

२०४

लल बो ज्ञायस स्वमन बागु बरस
वुछुम शिवस शक्त मीलिथ तु वाह ।
तँत्य् लय कँरुम अमृतु सरस
जिंदय मरस तु मे करि क्याह ॥

★ ★ ★

२०५

लल बो द्रायस कपसि पोशिचि सँचुय
काँड्य तु दून्य् वँरनम यँचुय लथ ।
तुयि येलि खारिनम ज़ाँविजि तुये
वोवुरि वानु गँयम अलाँजुय लथ ॥

★ ★ ★

२०६

लल बो द्रायस दोरे दोरे
कुलुफ थँविथ वछस ।
युस नोन नेरे सु फोट क्रेरे
ख्योन दीतोन यछस ॥

★ ★ ★

२०७

लल बो द्रायस शिव गारने
वुछुम शिव तु शेतान अँक्य् सुय शये ।
शेतान वुछुम प्यठ मिम्बरस
हाँरान गँयस तमी गरे ॥
बु पाँर्य् शिवस तु शिवु सुंदिस गरस
बु लल मरस तु मे क्याह करे ॥ ॥

★ ★ ★

२०८

ललि मे दोपुक लूकु हांड करुन्य्
तवय चोलुम मनु शेंख ।
माघ नोवुम आग चोलुम
क्रेहन्यल कोसुम मनि शेंख ॥

★ ★ ★

२०९

ललि ग्वर ब्रह्मांडु प्यठ कुन वुछुम
शशिकल वेंछुम पादन तल ।
ज्ञानुकि अमृतु प्रकृत बॅरुम
लूबय मोरुम अंदु वंदु ताम ॥

★ ★ ★

२१०

लॅराह लॅज़ुम मंज़ माँदानस
अँद्य अँद्य वॅर्यमस तँकियि तु गाह ।
स्व रोज़ि येत्य् तय बो गछु पानस
वोन्य् गव वानस फालव दिथ ॥

★ ★ ★

२११

लॅलिथ लॅलिथ वदय बो वाय
चित्ता मुहुच पेयी माय ।
रोज़ी नो पतु लोह लंगरुच छा़य
निज़ स्वरुफ क्याह मोटुय हाय ॥

★ ★ ★

२१२

ला इला इलल्लाह सही कोरुम
वॅह्य कोरुम पनुन पान ।
वोजूद त्रॉविथ मोजूद रोटुम
तेलि मे म्यूलुम ला मकान ॥
(यि वाख छु नुन्दु ऋषिस (शैख-उल-आलमस) कुन ति मनसूब
यिवान करनु । वुछिव लल द्यद - ताँलिब तु कौल)

★ ★ ★

२१३

लाचारि बिचारि प्रवाद कोरुम
नदुर छुवु तु हेयिव मा ।
फीरिथ दुबारु जान क्याह वोनुम
प्रान तु रोहन हेयिव मा ॥

★ ★ ★

२१४

लूब मारुन सहज व्यचारुन
द्रोग ज्ञानुन कल्पन त्राव ।
निशि छुय तय दूर मो गारुन
शून्यस शून्या मीलिथ गौव ॥

★ ★ ★

२१५

लोलुक नार ललि ल्वलि ललुनोवुम
मरनय म्वयस तु रूजुस नु ज़रय ।
रंगरिछ ज़ातुसुय क्याह नु रंग होवुम
बो दपुन च़ोलुम क्याह सनु करय ॥

★ ★ ★

२१६

लोलुकि व्वखलु वॉलिंज पिशिम
क्वकल च़ंजिम तु रूजुस रसु ।
बुज़ुम तु ज़ॉजिम पानस च़ंशिम
कवु ज़ानु तवु सुत्य् मर किनु लसु ॥
बोय ना म्वयस तु बोय ना मरु
येलि अँछव डेंशु तु कनव बोज़ु ॥ ॥

★ ★ ★

२१७

वदनु सुत्सु गलश हो मरी
वदनु मदुन मेली नु ज़ांह ।
मन कर सफ़ा ज़ेरि अकि मेली
यिमव शालु टुंगव नेरि नु केंह ॥

★ ★ ★

२१ॢ

व्वथ रॉन्या, अर्चुन सखर
अथि अलपल वखुर ह्यथ ।
योद वनय ज़ानख परम पद अक्षर
हे शीखर खे शीखर ह्यथ ॥

★ ★ ★

२१९

वाख मानस क्वल अक्वल ना अते
छ्वपि मुदरि अति ना वीश ।
रोज़ान शिव शक्ति ना अते
म्वतियै कुंह तु सुय व्वपदीश ॥

★ ★ ★

२२०

वाख स्यद छोह दिथ म्खस बीठुम
स्वखस डीठुम रोजनस शाय ।
दूखस अंदर नैदुर मीठुम
ब्बद येलि ज़ीठुम, मीठुम कथ ॥

★ ★ ★

२२१

वावुच ग्राया पानस वुछिम
वानस डीठुम सोरि रंगु वस ।
द्यानस अंदर दमु दमु मीलुस
ग्वनन त्रोवुम मुच्चरिथ बर ॥

★ ★ ★

२२२

वुछान तु बो छस साँरिसुय अंदर
वुछुम ज़िलान साँरिसुय मंज़ ।
बूज़िथ तु रूज़िथ वुछ हरस
गरु छु तसुंदुय, बो क्वसु लल ॥

★ ★ ★

२२३

शयि आँसुस शयि छस
लल बु पानय पानस छस ।
नीरिथ गछान तीलिथ यिवान
मीलिथ पानु दयी छस ॥

★ ★ ★

२२४

शहनि हुंद शिकार गाँठ कवु ज्ञानि
हाँठ कवु ज्ञानि पोत्रय दोद ।
शमहक सोज लॅश कवु ज्ञानि
मॅछ कवु ज्ञानि पाँपर्य गथ ॥

★ ★ ★

२२५

शिव गुर ताँय केशव पलुनस
ब्रह्मा पायर्यन व्वलस्यस ।
यूगी यूग कलि परज्ञान्यस
कुस दीव अश्ववार प्यठ चड्यस ॥

★ ★ ★

२२६

शिव छुय जॉव्युल ज़ाल वाहरॉविथ
क्रंज़न मंज़ छुय तॅरिथ क्यथ ।
ज़िंदु नय वुछहॅन अदु कति मॅरिथ
पानु मंज़ पान कड व्यचॉरिथ कथ ॥

★ ★ ★

२२७

शिव छुय थलि थलि रोज़ान
मो ज़ान ह्यौद तु मुसलमान ।
त्रुख अय छुख तु पान पर्ज़नाव
स्वय छय साहिबस सुत्य् ज़ॉनी ज़ान ॥

★ ★ ★

२२८

शिव तु शक्त कत्यो डींठिम
तिमव रॅटुम कायस जाय ।
दायस धीर्यसस सनय मीठुम
तीलिथ रुज़ुम त्राँविथ लर ॥

★ ★ ★

२२९

शिव वा कीशव वा जिन वा
कमलजनाथ नामधारिन युह ।
मे अबलि काँस्यतन भव-रुज
सु वा सु वा सु वा सुह ॥

★ ★ ★

२३०

शिव शिव करान हम्सु गथ सोरिथ
रुजिथ व्यवहॉर्य द्यन क्यो राथ ।
लागि रोस्त अद्वय युस मन वॅरिथ
तँस्य न्यथ प्रसन सुरगुरुनाथ ॥

★ ★ ★

२३१

शिव शिव करान शिव नो तोशे
ग्यव कंदि जलख मनस सु आसे ।
ग्यव द्यू दीहस दीह दोर आसे
ग्यव नय दीहस दिख दिवर काँसे ॥

★ ★ ★

२३२

शिशरस वुथ कुस रटे, कुस ब्वके रटे वाव ।
युस पांच्र यँद्रेय च्चेलिथ च्चटे, सुय रटे गटे रव ॥

★ ★ ★

२३३

शील तु मान छुय पोन्य् क्रंजे
म्वछि येम्य् रोट मँल्य् योद वाव ।
होस्त युस मस्त-वालु गंडे
ति यस तगि तय सु अदु निहाल ॥

★ ★ ★

२३४

शीलायि हुंजुय व्वतमा बँजुम
सौंबरुम ट्योक पोश आसन पठ ।
मनस अंदर व्यच्चार कोरुम
वुछुम तु ड्यूठुम शील कनि वठ ॥

★ ★ ★

२३५

शुन्युक माँदान कोडुम पानस
मे ललि रूजुम नु ब्वद न होश ।
वेजुय सपनिस पानय पानस
अदु कमि गिलि फोल ललि पम्पोश ॥

★ ★ ★

२३६

शे वन चॅटिथ शशिकल वुजुम
क्रिंत होंजुम पवनु सुतिय ।
लोलुकि नारु वॉलिंज बुजुम
शंकर लोबुम तमिय सुतिय ॥

★ ★ ★

२३७

श्रान तय द्यान क्याह सन करी
च्यतस रठ त्रकरे वग ।
मनस तु पवनस मिलवन करे
सहजस मंज कर तीर्थ स्नान ॥

★ ★ ★

२३८

सत् संगे पवित्र दोरुम
नवि सँच्च रूजुस त्रोपरिथ बर ।
दशि दशमी द्वार जिंलोलुम
ईकादशि चँद्रमस वॅरुम लय ॥
द्वादशि मंडलु द्यख शुमरोवुम
त्रयूदशि त्रिवेनी नॉवुम काय ।

चतुर्दशि च्वदाह भवन शमाँविम
पूर्ण पांचदशि चंद्रन कोरुम व्वदय ।।
ओकद्वह भूगी पान संदोरुम
रसुति रूज़स कल्पन त्राँविथ ।
स्वय हा मालि वँरुम प्वतल्यन पूज़ ।।

★ ★ ★

२३९

सम्सार हो मालि यारिव जंगुल
लारी क्यलम तु बेयि बद ब्वय ।
गरु करुन हो मालि प्यठ प्योन संगुर
नेरख नंगुर तु दरोग गोय ।।

★ ★ ★

२४०

सम्सारु नाँम्य् ताँव तँच्युय
मूडन किच्युय तावनु आये ।
ज्ञानु मुद्रा छा यूगियन किच्युय
सु यूग कलि किन्य् परज़नु आये ।।

★ ★ ★

२४१

सम्सारस आयस तपुसुय
ब्बदि प्रकाश लोबुम सहज्ज ।
मर्यम नु कुंह तु मरु नु काँसि
मरु नेछ तु लसु नेछ ॥

★ ★ ★

२४२

सम्सारस मंज्ज बाग कथ शायि रोज्जय
रोज्जि परमु शिव शम्भू अघूर ।
ल्वलि मंज्ज बाग बुय ललुनावन
जिगरस मंज्ज बाग करस गूर गूर ॥

★ ★ ★

२४३

सरस सुती सोदा कोरुम
हरस वेँरुम ग्वडु सीवन ।
शेरस पेठ्य किन्त्य नञ्जान ड्यूटुम
गछान ड्यूटुम आयम पछ ॥

★ ★ ★

२४४

स्वन द्राव वह्नि तु मल गव वँथिथ
येलि मे अनलाहि द्युतुमस ताव ।
कतुर ज़न गँयस लोलु व्यगलिथ
येलि कठकोश च़ोल निशि रव द्राव ॥
लल बो रूज़स तेलि शिहलिथ
येलि च़्यतस प्यव बो तस नाव ॥

★ ★ ★

२४५

स्वर्गस माज़ुन क्याह छुय बासुनो
नरकस वासुन आसुन दूश ।
च़ख रुश नासुन शिव मय आसुनो
पानय आसुन कासुन भीद ॥

★ ★ ★

२४६

स्वर्गु जामु त्रॉविथ अलख प्रोवुम
दग ललुनॉवुम दयि संज़ि प्रये ।
पोत ज़ूने मोत वुज़नोवुम
च़ेन तु मालि कुलिस प्यठ नेंदुर पेये ॥

★ ★ ★

२४७

स्वयि कुल नो द्वुद सुत्त्यु सँगिजे
सर्पिनि ठूलन दिजि नो फाह ।
सेकि शाठस फल नो वँविजे
रावुर्युजि नो कोम याजन तील ॥

★ ★ ★

२४८

सहजस शम तु दम नो गछे
येछि नो प्रावख मुक्ति द्वार ।
सलिलस लवण जन मीलित्थ गछे
तोति छुय दुर्लब सहज व्यचार ॥

★ ★ ★

२४९

सहनुकि सलिलु योदवय मल कासख
आसख ऑनु खोतु प्रजलवुन शीनु खोतु प्रोन ।
पानय मरख पानय लसख
लागख ओन, ज़ोर कोल तु रोन ॥
शिवस सुत्त्यन येलि कथन रसख
शिवुय छुख पानय थव छिंन ॥ ॥

★ ★ ★

२५०

सँचसस न सातस पँचसस नु रुमस
सु मस मे ललि चव पनुनुय वाख ।
अँदर्युम गटख रँटिथ तु वोलुम
चँटिथ ति द्युतुमस तँती चाख ॥

★ ★ ★

२५१

साह्यब छु बिहिथ पानय वानस
साँरिय मंगान केंछा दि ।
रोट नो काँसि हुंद रॉछ नो वानस
यि च्ने गछिय ति पानय नि ॥

★ ★ ★

२५२

सेध मालि स्यधव, स्यदु कथन कन थाव
चु दूह पथ कालि सरन क्याह ।
बालकव, तुह्य क्यथव द्यन राथ बँरिव
काल आव कुठान तु वँरिव क्याह ॥

★ ★ ★

२५३

सोबूर छुय ज्युर मर्च तु नूनय
ख्यनु ट्योठ तु खेयस कुस ।
सोबूर छुय स्वनु सुंद टूरुय
म्वलु छुय थोद तु हेयस कुस ॥

★ ★ ★

२५४

ह्यथ कॅरिथ राज फेरिना
दिथ कॅरिथ तृप्ति नामन ।
लूब व्यना ज़ीव मरिना
ज़ीवन्त मरि तय सुय छुय ज्ञान ॥

★ ★ ★

२५५

हॅह निशि हाह द्राव शाह क्या गोवुय
हॅहस तु हाहस शाह च्युय ज्ञान ।
रूहु निशि मोर द्राव क्याह वुछुय
क्याह रूद बाकी क्याह गव फान ॥

★ ★ ★

२५६

हचिवि हारिंजि पेच्युव कान गोम
अबख छान प्योम यथ राजदाने ।
मंज बाग बाजरस कुलफु रोस वान गोम
तीर्थु रोस पान गोम कुस मालि ज़ाने ।।

★ ★ ★

२५७

हा च्यता कवु छुय लोगमुत पर मस
कवु गोय अपजिस पज्युक ब्रौत ।
दुशि बोज वश कोरनख पर दर्मस
यिनु गछनु ज्यनु मरनस क्रौत ।।

★ ★ ★

२५८

हा मनुशि ! क्याजि छुख वुठान सेकि लवर
अमि रटि हा मालि पकिय नु नाव ।
ल्यूखुय यि नारॉन्य् कर्मनि रुखि
ति मालि हेकिय नु फिरिथ कांह ।।

★ ★ ★

२५९

हे ग्वरा, परमेश्वरा
बावतम त्रे छुय अंतर व्योद ।
द्वशवय व्वपदान कंदि पुरा
हूह कवु तुरुन न हाह कवु तोत ॥

★ ★ ★

२६०

त्रेयि नैंगि सराह सरि सरस
अकि नैंगि सरस अर्शस जाय ।
हरम्वखु कौसरु अख सुम सरस
सति नैंगि सरस शिन्याकार ॥

★ ★ ★

२६१

त्रेशि ब्वछि मो क्रेशिनावुन
यान्य् छेयि तान्य् संदारुन दिह ।
व्रत चोन दारुन तु पारुन
कर व्वपकारुन स्वय छय क्रय ॥

★ ★ ★ ★ ★